

**1. DIEGO:** Lepep Moris ena responsabilite fer ferm baz militer Amerikin-Britanik lor **Diego Garcia**. Sa li dan kad dekolonizasyon. Li osi dan kad demilitarizasyon lemond. *No-enntri* pu bato deger dan tu larad nu Repiblik! 800 baz militer USA ek LOTAN, tu, ena pu ferme! Nu ena pu donn kudme demantel tu. Me, li nu devwar sakre fer ferm seki kot nu, Diego. Pu sa, nu alye li klas travayer dan Gran Bretayn ek USA. Baz militer reprezant *lokipasyon militer*. Baz egal ‘lager fitir’. Leta bizin kennsel sa lof Pravind Jugnauth pu donn USA enn bay lor Diego. Diego Garcia pa a-vann! Dayer, tanki ena inperyalis dan nu pei, revolisyon sosyalist pa fasil, pa posib.

**2. LATER:** Leta ena responsabilite rekizisyonn **later** tablisman ek so infrastruktur, kuma li ti fer pandan 2yem Ger Mondyal, pu asir sekirite alimenter pu lansanb lepep – si patron pa fer sa, li-mem. Kumsa osi asir kreasyon anplwa stab, e deviz pu aste prodwi deor. Si Leta pa fer sa li-mem, li responsabilite klas travayer obliz li. Lepep ena devwar kontrol later ek lamer parski zot dibyin piblik. Later ek lamer esansyel – kuma ler, dilo, manze – pu lavi. Zot asir manze, travay, lakaz, lwazir. Aret donn permi proprieter vann later ar milyoner deor pu vila delix!

**3. ANPLWA:** Leta ena responsabilite kree **anplwa stab** pu tu dimunn. Travay li enn drwa. Anmemtan klas travayer viz pu rul so prop sayt san patron – parski se klas travayer ki deza pe fer travay la marse. Patron li anplis. Ful anplwa, li ed devlop konsyans deklas dan klas travayer, e prepar nu pu fer revolisyon sosyalist.

**4. LABANK:** Enn leta klas travayer pu responsab pu kontrol demokratik total lor **labank ek finans**. Sa kapital la, e tu kapital, li totalite stok ki zenerasyon travayer lepase, e leprezan, finn e pe kontiyn prodir. Avek nuvo kapital imans dan data, innternet, intelizans artifisyel (A.I.), ena nuvo danze. Kapital bizin vinn su kontrol demokratik lansanb imin ki finn prodir li. Deza Leta finn kree kapital atraver MIC pandan lokdawn. E li finn sed li direk ar patron! Li bizin kapav kree kapital me demokratiz so kontrol. Dan sosyete sanklas li pu dibyin piblik.

**5. DEMOKRASI:** Prinsip **demokrasi** se “seki elir kikenn ena drwa retir li”. Tu depite eli, alor revokab. U ena drwa vote kot u rezide, kot u pey tax. Lasanble Nasyonal eli, si li *elir* Premye Minis, li kapav osi revok li. Enn Lasanble Nasyonal elarzi pu permet tir sistem bes-luzer *kominal* ki pa demokratik. Demokrasi bizin partu – nasyonal, rezyonal, lokal, e sirtu *dan travay*.

**6. LALIT DEKLAS:** Klas travayer ena pu deklans enn prosesis revolisyoner pandan so **lalit deklas**, e pran puvwar kan li propis. Sa mars ansam ar valoriz e transmet **konsyans deklas** pu ki klas travayer, ki deza rul tu lantrepriz, anfet pran sarz. Kumsa kumans batir sosyete sanklas. Bi nepli profi prive pu enn poyne, me plito byin-et pu tu. Travay pu an-asosyasyon. Depi zordi sak Departman pu gide par seki avans konsyans deklas, lalit deklas, lalit pu sosyalism – ki li Minister Ledikasyon, Lasante, Lapes, Lozman – inkli ranplas lakaz lamyant.

**7. PATRIARSI:** Ansam, nu pu chalennj inegalite sosyal kot nu truv li, kuma dan **patriarsi**. Ena tut-enn seri piramid patriarkal partu dan sosyete. Zot inegal. Tu relasyon imin bizin swiv prinsip egalite ant tu dimunn. Kumsa sosyete kapav vinn enn seri serk dimunn ki asosye ansam egal-egal, ki li lor sayt ubyin dan landrwa, napa res enn seri piramid, enn seri yerarsi, inegal kot seki lao ena puvwar fer dominier.

**8. TRAVAY MWINS:** Avek sa demokrasi ki sosyalism pu amene, tu dimunn klas travayer pu kapav **travay mwins** er-tan, e gayn enn reveni minimem garanti. Kumsa nu gayn plis letan reflesi, plane e pu lar, spor, lwazir.

**9. REPRESYON:** Li nesaser **fini ar represyon** patrona, represyon institisyon Leta, inkli lapolis e prizon, e osi liber nu depi laspe represif dan sistem ledikasyon ek dan lafami. Nu viz liberte pu tu dimunn.

**10. POLISYON:** Avek sa demokrasi ki pu ena, li pu fasil aret **polisyon indistriyel** ki dereggle klima e menas buku spishiyz. Ler, lamer, later, zot pu tu dimunn. Pli grav polisyon nu pei fer li lor baz Diego. Answit ena seki patron tablisman, lizinn, lotel fer ar pestisid, erbisid, deterzan, tintir. Klas travayer bizin reyni pu kontrol sa.

**11. INTERNASYONALISM:** Nu dan enn **lalit internasyonal** depi asterla-mem. Sosyalism pa posib dan enn sel pei. Li pa pu dire. E sosyalism li irzan pu anpes destriksyon lemond dan swa konflagrasyon lager nikleer, swa dezast ekolojik ki rezilta polisyon, ki fini dereggle klima e pe menas extinksyon spishiyz.

**12. LANGAZ KREOL:** Nu program depann pu so sikse lor partisipasyon enn gran lamas travayer dan prosesis politik, alor, etan done nu fason reflesi – tusek e ansam – li atraver nu *langaz natirel*, li inportan nu tu servi langaz maternel – oral e ekri – pu asir refleksyon ot-nivo par maximem dimunn. Kumsa kreativite epannwir. Lezot langaz, parkont, zot enn pon inportan ver nuvo konesans, e ver lezot pei.